

摘藻堂四庫全書薈要

集部

欽定四庫全書薈要

集部

宛陵集卷一至三

詳校官助教臣常循



欽定四庫全書薈要

宛陵集目錄

卷一

西京詩上

卷二

西京詩中

卷三

西京詩下



卷四

池州後詩上

卷五

池州後詩中

卷六

池州後詩下

汝州後詩上

卷七

汝州後詩中

卷八

汝州後詩下

湖州後詩一

卷九

湖州後詩二

卷十

湖州後詩三

卷十一

湖州後詩

四

卷十二

詩一

卷十三

詩二

卷十四

詩三

卷十五

詩四

卷十六

詩五

卷十七

詩六

卷十八

詩七

卷十九

詩八

卷二十

詩九

卷二十一

詩十

卷二十二

詩十一



卷二十三

詩十二

卷二十四

詩十三

卷二十五

詩十四

卷二十六

詩十五

卷二十七

詩十六

卷二十八

詩十七

卷二十九

詩十八

卷三十

詩十九

卷三十一

詩二十

卷三十二

詩二十一

卷三十三

詩二十二

卷三十四

詩二十三

卷三十五

詩二十四

卷三十六

詩二十五

卷三十七

詩二十六

卷三十八

詩二十七

卷三十九

詩二十八

卷四十

詩二十九

卷四十一

詩三十

卷四十二

詩三十一

卷四十三

詩三十二

卷四十四

詩三十三

卷四十五

詩三十四

卷四十六

詩三十五

卷四十七

詩 三十六

卷四十八

詩 三十七

卷四十九

詩 三十八

卷五十

詩 三十九

卷五十一

詩四十

卷五十二

詩四十一

卷五十三

詩四十二

卷五十四

詩四十三



卷五十五

詩 四十四

卷五十六

詩 四十五

卷五十七

詩 四十六

卷五十八

詩 四十七

卷五十九

詩 四十八

卷六十

記

序

賦

臣等謹案宛陵集六十卷宋梅堯臣撰堯臣

字聖俞宣城人官屯田都官員外郎其詩初

為謝景初所輯僅十卷歐陽修得其遺藁增  
併之亦止十五卷其增至五十九卷又他文  
賦一卷未詳何人所編陳振孫謂即景初舊  
本修為作序者殆未詳考修序文耳通考載  
正集六十卷又有外集十卷此為明姜竒芳  
所刊卷數與通考合惟無外集陳振孫謂外  
集多與正集複出或後人刪汰重複故所錄  
者止此耶宋初詩文尚沿唐末五代之習柳

開穆修欲變文體王禹偁欲變詩體皆力有  
未逮歐陽修崛起為雄力復古格其時曾鞏  
蘇軾蘇轍陳師道黃庭堅等皆尚未顯其佐  
修以變文體者尹洙佐修以變詩體者則堯  
臣也其詩旨趣古淡惟修深賞之邵博聞見  
後錄載傳聞之說謂修忌堯臣出已上每商  
榷其詩多故刪其最佳者其誕妄甚矣乾隆

四十二年五月恭校上

總纂官臣紀昀陸錫熊臣孫士毅

總校官臣陸費墀



宛陵集序

予聞世謂詩人少達而多窮夫豈然哉蓋世所傳詩者多出於古窮人之辭也凡士之蘊其所有而不得施於世者多自放於山巔水涯外見蟲魚草木風雲鳥獸之狀類往往探其奇恠內有憂思感憤之鬱積其興於怨刺以道霸臣寡婦之所歎蓋愈窮則愈工然則非詩之能窮人殆窮者而後工也予友梅聖俞少以蔭補為吏累舉進士抑於有司困於州縣凡十餘年年今五十猶

從辟書為人之佐鬱其所畜不得奮見於事業其家宛  
陵幼習於詩自為童子出語已驚其長老既長學乎六  
經仁義之說其為文章簡古純粹不求苟說於世世之  
人徒知其詩而已然時無賢愚語詩者必求之聖俞聖  
俞亦自以其不得志者樂於詩而發之故其平生所作  
於詩尤多世既知之矣而未有薦於上者昔王文康公  
嘗見而歎曰二百年無此作矣雖知之深亦不果薦也  
若使其幸得用於朝廷作為雅頌以詠歌大宋之功德



薦之清廟而追商周魯頌之作者豈不偉歟奈何使其  
老不得志而為窮者之詩廼徒發於蟲魚物類羈愁感  
歎之言世徒喜其工而不知其窮之久而將老也可不  
惜哉聖俞詩既多不自收拾其妻之兄子謝景初懼其  
多而易失也取其自洛陽至於吳興以來所作次為六  
十卷予嘗嗜聖俞詩而患不能盡得之遽喜謝氏之能  
次也輒序而藏之慶厯六年三月右正言知制誥知滁  
州事歐陽脩序

欽定四庫全書



序

欽定四庫全書蒼要卷一萬四千四百四十一

集部

宛陵集卷一

宋 梅堯臣 撰

和謝希深會聖宮

三后威靈遠層巒棟宇興衣冠漢原廟歌舞魏西陵日  
月融光盛山河王氣增叢楹琢文石連網絡朱繩碧瓦  
寒鋪玉重欄瑩鏤冰粹儀神霧擁法袞繡龍升星斗羅  
容衛軒墀侍股肱宸蹤耀璇榜瑞羽集觚稜闕殿深珠

箔雕垣界綺滕笙從縵嶺咽雲傍帝鄉凝龜組恭來詣  
貂璫肅奉承欲知歸厚意孝德自蒸蒸

右丞李相公自洛移鎮河陽

侯服齊三輔天臺聳百僚新章刻銅虎舊德冠金貂已  
作歌襦化方期執玉朝雙韃辭洛宅千騎向河橋鼓角  
春城暮鶯花故苑遙瓜亭猶接畛棠茇自敷條夾道都  
人擁迎風駟牡驕莫隨文學乘空望旆旌飄

上巳日午橋石瀨中得雙鰕魚

脩禊洛之濱湍流得素鱗多慙折腰吏來作食魚人水  
髮粘蒿綠溪毛映渚春風沙暫時遠紫線憶江蓴

寒食前一日陪希深遠遊大字院

一百五將近千門煙火微閒過少傅宅喜見老萊衣晚  
雨竹間霽春禽花上飛禪庭清溜滿幽興自忘歸

遊龍門自潛溪過寶應精舍

遙愛夏景佳行行清興屬安知轉迴溪始覺來平谷古  
殿藏竹間香菴遍巖曲雲霞弄霽暉草樹含新綠時鳥

自綿蠻山花競紛縟莫言歸路賒明月還相續

依韻和希深遊大字院

白傳  
舊宅

夫君康樂裔顧我子真派湛然懷清機超爾尋虛界暫  
來香園中共憇寒松大先生醉復吟長老言不壞信與  
賞心符寧同俗士愛杖屨恣遊遨池塘仍感慨焚香露  
蓮泣聞磬霜鷗邁青板今已空濁醪誰許載軟草當熊  
網低簷挂纓帶不覺月明歸候門僮僕怪

傷白雞

我庭有素雞翎羽白如脂日所慮狂犬未嘗憂孽狸暝  
棲向簷隙朝啄循階基每先烏鳥鳴不失風雨時雖吾  
困廩薄尚汝稻糧遺昨宵天氣黑陰物恣所窺潛來銜  
搏去但覺聲音悲開門俾馳救已過墻東陸呵叱不敢  
食奪然留在茲湧血被其頸噉呷氣甚危皓臆變丹赤  
霜翅兩離披憫心欲之活碎腦安能治委瘞從爾命孰  
忍薑桂為猶看零落毛蕩漾隨風吹念始託茲地蒙幸  
信可知充庖豈云患度日無苦饑如何遇兇獸毒汝曾

不疑斯事義雖小得以深理推鄧生賜山鑄未免終餒  
而人道尚乃爾愴焉聊俛眉

尹師魯治第伐樗

伊人利營構思欲新其居匠築經舊址簷楹礙高樗且  
云忍不伐何以成吾廬人言此樹古百怪所憑依獨秉  
一定議自將羣俗違乃俾執柯者丁丁霜刃揮殲殞條  
百尺橫仆株數圍從茲朝夕間不聞鳥雀喧既能考子  
室而復高其門周也昔騁辯得以不材論工今誠匪度



苟害安可存舟楫且非藉新纈聊用燔莫比溝中斷區  
區望犧樽

伊陽尉耿傳惠新栗

金行氣已勁霜實繁林梢尺素走下隸一奩來遠郊中  
黃比玉質外刺同芡苞野人寒齋會山爐夜火炮梨慚  
小兒嗜茗憶麤官拋此焉真可貺遽爾及衡茅

和楊子聰會董尉家

董生方好雅茲日為掃扉森爾延嘉賓歡然去塵機有

客振雙袂敢言陽春暉聊停玉麈尾為歌金縷衣古辭  
何稠疊無乃惜芳菲三閭不鋪糟二子自採薇雖留千  
載清未免當時饑吾愛曹公詩古來不敢非人生若朝  
露捨醉當何歸四座驚此語未厭翠觴飛胡能後天地  
何可恃輕肥沈酣且長詠白首空歔歔

嶺雲

片雨過青天山雲歸絕嶺林際隱微虹溪中落行影還  
看隴首飛復愛山間靜

垂澗藤

寒松偃澗濱弱蔓垂纓綠波縈翠帶長水濺低花馥終  
日採蘋人攀條映巖曲

林翠

鬱鬱長條抽林間翠堪翦背嶺山氣濃幽人趣不淺

舟中遇雪

曉風鳴大澤春雪下長河沙草綠堤沒楊花拂水多驚  
鷗不知遠候鴈幾聞過欲問耶溪轉今朝柰興何

田家

四時

昨夜春雷作荷鋤理南陂杏花將及候農事不可遲蠶  
女亦自念牧童仍我隨田中逢老父荷杖獨熙熙

草木遶籬盛田園向郭斜去鋤南山豆歸灌東園瓜白  
水照茅屋清風生稻花前陂日已晚聒聒競鳴蛙

荒村人自樂頗足平生心朝飯露葵熟夜春雲谷深採  
山持野斧射鳥入煙林誰見秋成事愁蟬復怨碁

今朝田事畢野老立門前拊頸望飛鳥負暄話餘年自

從備丁壯及此常苦煎卒歲豈堪念  
鶉衣著更穿

涂中遇雪寄希深

方為郡邑吏日與故人違極目千山碧  
馳心一鳥飛岸傍村杳杳波上雪霏霏  
欲寄洛陽信汧流行客稀

妾薄命

昔是波底沙今為陌上塵曾聞清泠混  
金屑誰謂飄揚逐路人悠悠萬物難自保  
朝看穠華暮衰老須知鉛黛不足論  
何必芳心競春草草有再三榮顏無一定  
好曩

恩寧重持徒能亂懷抱

秋日同希深昆仲遊龍門香山晚泛伊川觴詠久之席上各賦古詩以極一時之娛

落日川上好徘徊弄孤舟鳴榔進山口清唱發渡頭淺瀨不可泝停橈信中流山樽對蒼翠溪鳥自沉浮濯足破嵐影采菱臨芳洲千龕晚煙寂雙壁紅樹秋細細石間泉搖搖波際樓澄潭若瀉鑑萬象已盈眸康樂足清尚惠連仍此遊摘景固無遺

揮筆曾未休，醉來同淵明。興盡殊子猷，歸傍漁梁靜。  
行看夜火幽，露華初滴滴。夜吹何颼颼，不犯嚴城漏。誰  
言憐近丘。

依韻和希深雨後見過小池

碧池新雨後，清興一何賒。有客過顏巷，無貧似阮家。  
白醪聊泛蟻，黃菊未開花。既至休辭醉，君其柰歲華。

依韻和子聰夜雨

窗燈光更迥，宿霧晦層簷。寒氣微生席，輕風欲度簾。濕

螢依草沒暗溜想池添況值相如渴無嫌魯酒甜

和趙員外良佐趙韓王故宅

開國勲庸大重城邸第寬枯楊映樓角蔓草被墻端不見分香妾空餘鬪鴨闌誰來悲孔雀金翠羽毛殘

春日遊龍門山寺

還邀二三子共到鑿龍遊陰壑泉初動春巖氣欲浮竹藏深崦寺人渡晚川舟始覺山風急歸鞍不自留

依韻和希深遊府學



東府尊儒日中州進學初  
牲牢奠商後典籍講秦餘  
大法存無外羣英樂自如  
時慙遊聖末來駕折轅車

傷桑

柔條初變綠春野忽飛霜  
田婦搔蓬首冰蠶絕繭腸  
名翬依麥畦戴勝繞枝翔  
不見羅敷騎金鈎自挂墻

觀理稼

稂莠日已長忽忽芟薙初  
來時露沾屨歸去月侵鋤  
一腹餒猶甚百骸勤有餘  
吾無力畊苦謬讀古人書

新繭

露柘林初靜  
煙梯不復收  
春蠶吐絲足  
工女忌寒休  
翠薄時方獻  
清泉緒未抽  
閨中能自巧  
繡作玉釵頭

依韻和希深遊樂園懷主人登封令

竹映紅葉水  
榭開門閒  
乳雀下青苔  
伊人何戀五斗粟  
不作淵明歸去來

錦竹

此草也似竹而斑

雖作湘竹紋  
還非楚筠質  
化龍徒有期待鳳  
曾無實本

與凡草俱偶親君子室

廢井

墜廢不知年石欄蒼蘚澀渴心空自煩長綆曾誰汲無  
復語滄波坎蛙奚所及

茶竈

山寺碧溪頭幽人綠巖畔夜火竹聲乾春甌茗花亂茲  
無雅趣兼薪桂煩燃爨

候山子晉祠

以下陪太尉錢相  
公遊嵩山七章

王子居玉京故山空寂寞猶聞遡月笙尚想賓天鶴翠  
栢深古壇丹霞留迥壑芝庭誰欸扉旌旗穿林薄

少林寺

紅旌過翠岑林際瞻蓮宇門對幾千巖花開第一祖禪  
庭松色寒石室苔痕古寂寂不逢人空簷驚方乳

少姨廟

靈祠古殿深少室羣峯碧行雨欲隨車望巖非化石常  
聞蘭氣蒸誰奠椒香液寄謝洛川妃凌波定何益

天封觀

車馬雲外來，夜露半山雨。弭節扣真居，捫蘿笑塵矩。迴

溪響石叢靈，始抽巖塢玉。檻刻年華應，無愧前古。

殿檻石柱

上有唐樊宗師石鴻韓退之盧  
仝題名在焉今亦刻名於此

會善寺

杳藹隨龍節，縈紆歷寶山。瑠璃開淨界，薜荔啟禪關。煮  
茗石泉上，清吟雲壑間。峯端生片雨，稍促畫輪還。

啟母石

曠哉嵩室陽神怪所棲宅蒼石不知年靈熊去無迹煙  
巖想桂宮苔壁疑椒掖不學舜娥悲瀟湘竹枝碧

輟轅道

險絕稱漢關晨躋瞻一室盤紆石路回迤邐雲峰出古  
壁挂青蒼天風起蕭颼洛城西首時望望平煙密

中伏日陪二通判妙覺寺避暑

時有僧鼓琴於座上

紺宇迎涼日方床御綌衣清談停玉塵雅曲弄金徽高  
樹秋聲早長廊暑氣微不須河朔飲煮茗自忘歸

元政上人遊終南

雉節居杜陵南山常在目  
今茲羨行遊因以謝巖谷  
環錫恣探勝樓橰方踐陸  
五門嵐翠橫八水秋陰覆  
雲峰多隱見林嶺乍回復  
若見採芝人余非戀微祿

寄河陽簽判富彥國

籍籍名方遠人知第一流  
翻同貴公子來事外諸侯  
地險長河急天高畫角秋  
仲宣應自樂寧復賦登樓

河南受代前一日希深示詩

我昔在桐鄉伊人頗欣戴今來佐洛南事事為時背自  
愧居下流無能謝前輩固乏橫草功當蒙及瓜代且遺  
牒訴還何用吏民愛洗眼看舊書怡然忘宇內

秋雨

雨後秋氣早涼歸室廬清既摧蚊蠅勢任壯蛩蟬聲石  
榴墜枝熟蒼蘚緣堦生閉門且高臥畏向泥涂行

白雲和子聰

長憶江海間龍鳴向寒水藹藹蒼渚空悠悠白雲起是



時在漁舟放溜看未已  
今來居洛陽埃壘生蹄軌  
羨君  
茲日心怊悵聊徒倚

同尹子漸王幾道訪郭生別墅不遇

秋野已澄曠偶來幽興多  
茨居隔寒水柴戶蔭喬柯  
看竹曾留鳳攜朋不為鶯  
人歸碧苔徑應識履痕過

水荳

灼灼有芳艷本生江漢濱  
臨風輕笑久隔浦淡粧新  
白鷺煙中客紅蕖水上隣  
無香結珠穗秋露浥羅巾

黃河

積石導淵源  
汙汙瀉崑閬龍門自吞險  
鯨海終涵量怒  
狀生萬渦驚流非一狀  
淺深殊可測激射無時壯  
常苦事隄防何曾息  
波浪川氣迷遠山沙痕落  
秋漲槎沫夜浮光舟人朝  
發唱洪梁畫鷁連古戍  
蒼崖向浴鳥不知清夕陽  
空在望誰當大雪天走馬  
堅冰上

王氏昆仲歸寧

昨夜雪霏霏梁山吟未歸  
關河誰道遠鴻鴈自相依  
落

日人煙少寒雲驛路微  
共將彭澤酒稱壽向庭闈

子聰惠書備言行路及遊王屋物趣因以答

自我河橋來清話殊未已  
亟言閱通疇晨駕遂遵彼尺  
書忽見遺經由皆可紀  
草草始辭家忽忽渡河水前村  
客心速入暮陰風起修路隘  
且長疲驂未能止茅居聒  
夜春寒犬吠墟里明發西北行  
崗巒踰迤邐叢蓁但蒙  
密未見山中美谷開逢邑閭  
豈謂連都鄙冠帶一二同  
麇麇左右比問子奚所之  
俛眉聊啟齒暫往登天壇煙

雲隨步趾傍臨日觀低却望高丘邇屑屑視塵埃紛紛  
若螻蟻便有林壑心期將榮宦委我昔愛青蒼無時常  
徙倚今朝羨君遊勝事空聳企徒嗟黃綬身莫接青霞軌  
安得憑羽翰幽懷寄如此

環州通判張殿丞

亢

欲向蕭關外窮陰雪暗沙磧寒鴻鴈少冰合水泉賒自  
有從軍樂應無去國嗟春風曾不到吹角寄梅花

張太素之邠幕

應幕向幽郊晨裝辭郊鄆長亭欲少留飛鵠初成曲魯  
酒上離顏行塵生驥足悠悠關戍遙黯黯煙雲屬塞邑  
多苦寒國風遺舊俗寄音文讌餘莫待霜條綠

孫屯田召為御史

薦牘交車府恩書下建章輕軒辭瑞翟危弁學神羊祖  
酌方滋桂行威欲犯霜鳳毛仍襲慶雞舌更含香氣鬱  
翔龍關風清振鷺行今朝洛民思東陌盛壺漿

與諸友普明院亭納涼分題

岸幘清涼地，翛然樂未窮。  
竹陰過晚雨，林表見殘虹。  
花影平波上，經聲小塢東。  
還思醉吟者，寧與此時同。

梅花

似畏羣芳妬，先春發故林。  
曾無鶯蝶戀，空被雪霜侵。  
不道東風遠，應悲上苑深。  
南枝已零落，羌笛寄餘音。

依韻和希深立春後祀風伯雨師畢過午橋莊

青郊誰駐馬，謝客思池塘。  
野水微波綠，江梅嫩葉黃。  
初從奠風雨，遂此樂壺觴。  
已愛幽禽語，園林即日芳。

尹子漸歸華產茯苓若人形者賦以贈行

因歸話茯苓久著桐君籍成形得人物具體存標格神  
岳畜粹和寒松化膏液外凝石稜紫內蘊瓊腴白千載  
忽旦暮一朝成琥珀既瑩毫芒分不與蚊蚋隔拾芥曾  
未難為器期增飾至珍行處稀美價定多益

初見杏花

不待春風徧煙林獨早開淺紅欺醉粉肯信有江梅

宛陵集卷一



欽定四庫全書  
會要卷一萬四千四百四十二

集部

宛陵集卷二

宋 梅堯臣 撰

依韻和戴陽登廣福寺閣

過聞聯騎出登覽思踰清曉漲林煙重春歸野水平始  
看僊杏發已愛袂衣輕誰見吟餘處殘陽上古城

依韻和歐陽永叔同遊近郊

洛水橋邊春已迴柳條葱蒨眼初開無人拾翠過幽渚

有客尋芳上古臺林邃珍禽時一轉酒酣紅日未西顏  
知君最是憐風物更約偷閒取次來

依韻和永叔同遊上林院後亭見櫻桃花悉已  
披謝

去年君到見春遲今日尋芳是夙期祇道朱櫻纔弄葉  
及來幽圃已殘枝飄英尚有遊蜂戀著子唯應谷鳥知  
把酒聊能慰餘景乘歡不厭夕陽時

依韻和王幾道涂次杏花有感

馬上逢丹杏芳條拂眼過可憐荒徑少不道故園多艷  
萼粘紅蠟僊葩綳薄羅客心知易感路遠柰愁何

遊園晚歸馬上希深命賦

興盡夕陽天言歸躍杏韉新陰六街樹遠目萬家煙歌  
咽樓千尺吟餘月一弦花間有遊妓醉去墮金鈿

留題希深美檜亭

幽深有佳趣曾不減林泉衆綠經新雨殘紅墮夕煙栽  
萱北堂近夢草故池連乘月時來往清歌思浩然

留守相公新剏雙桂樓

藻棟起霄間芳條俯可攀  
晚雲談次改高鳥坐中還  
日映城邊樹虹明雨外山  
唯應謝池月來照衮衣間

和希深避暑香山寺

有客乘新霽雲林共扣肩  
輕舟過下渡遠水漲前汀  
原隰含幽藹岑嵐入杳冥  
誰知得深趣屐齒石苔青

和希深晚泛伊川

放溜下平波舟移不知遠  
稍迴溪口風恣愛雲中巘  
水

鳥靜相依蘆洲藹將晚歸路莫言賒何妨乘月返

路中月夕登霽景臺與唐英話別

風枝不動月光午況是高臺過新雨吳客方思千里歸  
不負洛陽塵與土到時水落鰕鱸肥香稻初炊鱠紅縷  
休言羊酪敵蓴羹我亦長吟念東楚平胡馬嘶誰可留  
去去相望富春渚

張侍郎中隱堂

疇昔人歸老於茲望白雲門高知後慶賓至誦先芬草

樹中園秀衣冠舊里聞寧同江令宅寂寞向淮濱

太尉相公中伏日池亭宴會

得山字

何言避暑清宴水軒閒竹氣陰池鳳雲峰照袞山玳  
簪方映座綵服亦承顏樂奏寒波上杯香綠芰間瓜浮  
五色爛簾捲半鉤寧今日賓裾盛袞劉豈足攀

送臧尉

藹藹神僊尉西風躍馬歸離羣賦黃鵠拜慶著斑衣雨  
氣連關黑槐花上路飛同為洛陽客今日故人稀

新秋普明院竹林小飲詩

并序

余將北歸河陽友人歐陽永叔與二三君具觴豆選勝  
絕欲極一日之歡以為別於是得普明精廬醺酒竹林  
間少長環席去獻酬之禮而上不失容下不及亂快然  
嘯歌趣逸天外酒既酣永叔曰今日之樂無愧於古昔  
乘美景遠塵俗開口道心胸間達則達矣於文則未也  
命取紙寫昔賢佳句置坐上各探一句字字為韻以誌  
茲會之美咸曰永叔言是不爾後人將以我輩為酒肉

狂人乎頃刻衆詩皆就乃索大白盡醉而去明日第其篇請余為叙云

得高樹早涼歸

翻然思何苦昨夜秋風高良友念將別幅巾邀此遨清  
梵隔寒流亂蟬鳴古樹誰知林下遊復得盃中趣池上  
暑風收竹間秋氣早回塘莫苦留已變王孫草未墜高  
梧葉初生玉井涼愁心異潘岳獨自向河陽不減阮家  
會所嗟當北歸耿耿敢辭醉明發此歡非



新秋雨夜西齋文會

夜色際陰霾燈青謝客齋梧桐生靜思絡緯動秋懷小  
酌寧辭醉清言不厭諧誰憐何水部吟苦怨空階

秋陰

已過蕭蕭雨猶成黯黯陰登臨潘岳思慄慄楚臣心遠  
吹鳴高樹低雲冒晚岑久為關外客不忍聽疎砧

雨中移竹

荷鋪冒秋霖忽忽移翠竹欲分溪上陰聊助池邊綠中

散林未開子猷心已足青青謝栽培豈愧凡草木

希深所居官舍新得相府蔬圃以廣西園

楚相拔葵後蕭條三畝餘煙畦偶連畛蕙圃得增墟便  
欲開春沼何妨薤野蔬始添臺榭美況近子雲居

和永叔柘枝歌

留守相公  
南莊按舞

漁陽三疊音隆隆紅蕖亂坼當秋風披香擁霧出妖嫵  
嫵眉壯髮翩驚鴻鏘鏘雜珮離芳渚珠帽紅靴振金縷  
相迎垂手勢如傾障袂倚詞欲吐最憐應節乍低昂

便轉疾徐皆可覩飄揚初認雪迴風躑躅還看爾縈緒  
小小寧聞怨曲長盈盈自解依儔侶藝奇體妙按者誰  
金貂大尹宴清池綺茵繡幄粲輝映玳簪珠履何委蛇  
是時郊原新退暑天清氣爽過林墅淮王載酒昔嘗聞  
謝公攜妓那能數始知事簡樂民和不厭來觀柘枝舞  
依韻和載陽郊外

近隰葱蘢曙驚鳥睥睨啼日光林杪動吹騎管中嘶路  
遶寒原古煙橫遠戍迷今來異賓孟誰復嘆雄雞

奉和永叔得辛判官伊陽所寄山桂數本封殖之  
後遂成雅韻以見貺

團團綠桂叢本自幽巖得惠好知不忘青葱寧改色香  
生蓮幕間花白萱堂側月露夜偏滋瓊枝相翕赫

河陽秋夕夢與永叔遊嵩避雨於峻極院賦詩及  
覺猶能憶記俄而僕夫自洛來云永叔諸君陪希  
深祠岳因足成短韻

夕寢北窻下青山夢與尋相歡不異昔勝事却疑今風

雨幽林靜雲煙古寺深

此二句攬夢中得

衣方有感還喜問來

音

希深惠書言與師魯永叔子聰幾道遊嵩因誦而  
韻之

聞君奉宸詔瑞祝疑靈岫山水聊得游志願庶可就豈  
無朋從俱況此一二秀方蘄建春陌十刻殘晝漏初經  
緱氏嶺古栢尚鬱茂却過轅轅關巨石相撐鬬夕齋禮  
神祠法袞被藻繡畢事登山椒常服更短後從者十數

人輕齋不為陋是時天清陰力氣勇奔驟雲巖杳虧蔽  
花草藏澗竇傍林有珍禽驚聒若避殼盤石暫憩休泓  
泉助吞漱上窺玉女窻漸絕非可構下玩搗衣碓焜耀  
金紋透尹子體雄校攀緣愈習狃歐陽稱壯齡疲軟屢  
顛踣競歡相扶持芒屨資踐蹂八僊存故壇三醉孰云  
謬鄙哉封禪碑數子昔鐫鏤偶誌一時事曷虞來者詬  
絕頂瞰諸峰隘然輕宇宙遙思謝塵煩欲知羣鳥獸韓  
公傳石室聞之固已舊當時興稍衰不暇苦尋究東崖

暗壑中釋子持經呪於今二十年飲食同猿狖君子聆  
法音充爾溢膚腠嘗期躡屐過吾儕色先愀

叶韻

遂乖真

諦言茲亦甘自咎中頂會幾望涼蟾皓如畫紛紛坐談  
譎草草具觴豆清露濕巾裳誰人苦羸瘦便即忘形骸  
胡為戀纓綬或疑桂宮近斯語豈狂瞽歸來遊少室嶠  
崒殊引脰石室迢遞過探訪仍邂逅捫蘿上岑邃僊屋  
何廣袤乳水出其間涓涓自成溜凡骨此熏蒸靈真安  
可覲霞壁幾千尋四字侔篆籀咸意苔蘚文誠為造化

授標之神清洞民俗未嘗邁忽覺風雨冥無能久瞻扣  
忽忽遂宵征勝事皆可復俚歌縱喧譁怪說多駸粼凌  
晨關塞陽追賞顏匪厚窮極四百里寧憚疲左右昨朝  
書報予聞甚醉醇耐所嗟遊遠方心焉倍如疚

送河清賈主簿歸任

不遠水雲間悠悠泝鷁還分亭接雞犬舉酒對河山殘  
雪依荒磧寒煙入暝灣昔人鸞枳歎一併在離顏  
依韻和永叔雪後見寄兼云自尹家兄弟及幾道



散後子聰下縣久不得歸頗有離索之歎

常欲登芒嶺無由見洛橋雪飛關戍迥人憶剡溪遙  
廣隰嘶征鴈長河起怒飈遠言歡友散能使去魂銷  
晚日窮幽藹愁雲暝沈寥縱令佳約在載酒定何邀

依韻和歐陽永叔黃河八韻

少本江南客今為河曲遊歲時憂漾溢日夕見奔流  
齧岸侵民壤飄槎閣鴈洲峻門波作箭古郡鐵為牛  
目極高飛鳥身輕不及舟寒冰狐自聽源水使嘗求  
密樹隨

灣轉長罾刮浪收如何貴沈玉川興是諸侯

季父知并州

捧詔出明光飛軒陟太行玉墀分近侍虎綬給新章  
茄吹喧行陌旌旗卷夜霜鴈歸汾水綠城壓代雲黃  
土屋春風峭羶裘牧騎狂關山寧久駐剩宴柳溪傍

河陰中寨寒食

擊柝聲初絕為魚夢已殘幽禽哢清曉宿雨度餘寒  
繫火明千竈風旗展一竿歸心慙社鷺自歎此微官

再至洛中寒食

西洛逢寒食依依似昔年  
千門方禁火九野自生煙  
飄泊梨花雨追隨杏葉鞦  
遊人莫惜醉風景滿伊川

同永叔子聰遊嵩山賦十二題

公路澗

我來袁公溪斷岸猶殘壘  
僵柳遠臨灣新蒲初出水  
行古臺近兩兩驚禽起雞犬何處聞人家深塢裏

拜馬澗

王子昔凌霓國人茲拜馬依佈日夜笙聲入寒泉瀉空  
傳七日期飛鶴何時下

二室道

度嶺失羣山千峰出天際方欣左右看屢改縈迴勢勝  
事誰與同芬然有蘭蕙

自峻極中院步登太室中峯

稅駕綠巖前攀蘿不知倦人從樹杪來路向雲端轉忽  
覺在煙霓回看峰嶺變

玉女窻

玉洞倚霞壁天窻露微明  
驂鷺去不返啼鳥空相驚  
萬木自虧蔽捫蘿復誰情

玉女擣衣石

幽石稱擣衣擣衣人不見  
雲纓白飄颻巖樹長葱蒨  
猶應寒夜中山月來鋪練

天門

古壁何蒼蒼穿雲玉梯出  
歛然起青冥却立觀少室  
前

巖復後峯陰晴狀非一

天門泉

泠泠雲外泉的的巖光入靜若僊鑑開寒疑玉龍蟄時  
應下鹿羣跡印青苔濕

天池

安知最高頂清淺水池開有時片雲出倏忽生風雷誰  
羨雙黃鵠刷羽來徘徊

三醉石

相期物外遊共醉僊壇石舉手薄高穹清風生兩腋都  
忘塵世煩笑傲聊為適

登太室中峰

日夕望蒼崖漸漸在天外及來步其巔下見河如帶半  
壁雲樹昏山根已霧霏

峻極寺

山高路已窮條爾逢蘭若落日老僧閒支願古松下緩  
步入禪庭苔蒼但蕭灑

擬玉臺體七首

欲眠

鴛鴦羅薦開翡翠香幃寂解帶竟羞明移燈向東壁

攜手曲

攜手出中閨殷勤尅密期密期雖不遠迴顧步遲遲

雨中歸

來時雲冉冉去值雨霏霏莫怪羅衣濕荆王夢罷歸

別後



昨日日暮別今日日暮愁猶認縱裙色依依在石榴

夜夜曲

情來不自理明月生南樓坐感昔時樂翻成此夜愁

落日窻中坐

含情獨不語落日窻中時妾意與君意相思只自知

領邊繡

出門重新製纖手行自整願作花工兒長年承素頸

無題

斗覺瓊枝瘦慵開寶鑑粧臨風恐僊去倚扇怯歌長綠  
桂薰輕服靈符佩縹囊西隣空自賦不解到君傍

宛陵集卷二

欽定四庫全書會要卷一萬四千四百四十三

集部

宛陵集卷三

宋 梅堯臣 撰

依韻和希深新秋會東堂

何必水周堂  
翛然萬木涼  
朋簪茲共樂  
節物自迎商  
巧笑承歡劇  
新詞度曲長  
驂鸞悲霧扇  
泛蟻醕雲漿  
並蒂榴房熟  
連叢桂葉香  
人初投轄醉  
客甚搵櫓狂  
鬢約寒鵝碧  
衣輕舞蝶黃  
流波閒任注  
錯席豈依行  
亶亶談寧

倦厭厭夜未央良時誠可惜清燕此無荒

客鄭遇曇穎自洛中東歸

禪衣本壞色不化洛陽塵獨有煙霞染況將山水親西  
風入闕戍宿雨過城闌誰羨飄然跡吾車亦已巾

馬判官歸闕

與君歸洛陽仕宦頗相偶荏苒遷歲時徘徊樂文酒今  
歸已及瓜為贈聊折柳亦將隨計書慙別寧嗟久

餞彭城公赴隨州龍門道上作

零雨送車輪初清遠陌塵歸藩漢東國遮道洛陽人伊  
水照虹旆楚山懷玉麟征軒不可戀梗淚返城闔

早行道中相逢

黥黥雨雲晦駸駸車馬繁唯憂不及見及見返無言

古意

故人留雅曲今與新人彈新人聽不足復使後人歡

送弟良臣歸宣城

喬木句溪邊秋光幾曲連將歸三畝宅遠寄下江船伴

爾唯征鴈悲余有暮蟬親朋如見問貧外似當年

河南張應之東齋

昔我居此時鑿池通竹圃池清少游魚林淺無棲羽至  
今寒窻風靜送枯荷雨雨歇吏人稀知君獨吟苦

河南王尉西齋

官舍古城隅西齋何寂寂種竹幽趣深開屏翠光滴青  
山露南牆落日明東壁危臺起其傍平隰坐可覲歲暮  
野田空天高霜隼擊更憐風月時幾弄林間笛

劉秀才歸河內

君家太行下應復近蘇門河氣知寒早嵐煙覺暮昏犬  
鳴林外火笛響月中村久作山陽客逢人為寄言

憶洛中舊居寄永叔兼簡師魯彥國

東堂石榴下夜飲曉未還絺衣濕皓露桂酒生朱顏君  
同尹與富高論曾莫攀開吐仁義奧傲睨天地間以此  
為朋樂衡門未嘗關自從北闕來擾擾時少閒登危欲  
引望尚不見雲山何由覲夫子客袂淚瀾斑

## 武陵行

生事在漁樵所居亦煙水野艇一竿絲朝朝狎清泚忽  
自傍藤陰乘流轉山背始覺景氣佳潜通小溪裏常時  
不見春入谷驚紅蘂幽興窮綠波翫芳心莫已花外一  
峰明林間碧洞啟遙聞雞犬音漸悟人煙邇捨舟遂潛  
行石徑劣容屣豁然有田園竹果相叢倚厖眉鑿髻人  
條遇心顏喜尚作秦衣裳那知漢名氏自言逢世亂避  
地因居此來時手種桃今日開如綺更看水上花幾度



逐風委競引飯彫胡邀飲酌瓊醴復呼童稚前綠鬢仍  
皓齒翻遣念還茅思歸釣鱸鮓將辭亦贈言勿道丘壑  
美鼓枻出僊源繁英猶邈迤薄暮返蒼洲微風吹白芷  
他日欲重過茫茫何處是

西宮怨

漢宮中選時天下誰為校寵至莫言非恩移難恃貌一  
朝居別館悔如何由效買賦豈無金其如君不樂

夏夜小亭有懷

西南雨氣濃林上昏月色寒影不隨人寥寥空露白

外兄施伯侃下第赴并門叔父招

共是干時者同為失意人言趨太原召如慰宛陵親笳  
鼓聽臨塞琴書未離身別君無斗酒當識士安貧

鄭戩及第東歸後赴洋州幕

鄰生方得桂王粲始從戎一舸辭吳會單車入漢中亂  
山雲木古側徑野泉通欲識風煙美心知故國同

施判官赴饒州

昔日里中舊今為幙下英煙波歸楚國風月滿都城食  
有江魚美時無羽檄驚他年儻行縣肯使折腰迎

楊旼赴官并州

嘗聞地近胡寒氣盛中都車馬行臨塞關山見落榆吳  
鉤皆尚壯章甫幾為儒寄謝西曹掾能吟秀句無

歐陽寺丞桐城宰

葉落淮南樹青山徧馬頭人煙將近郭松竹不知秋夜  
虎林間嘯溪泉舍下流門前仲卿廟遺跡待君求

朱邑冢祠

在焉

祝熙載赴任東陽

李都尉客

東陽美山水之子本風流稍去何平叔還追沈隱侯清  
江飛晚雨斜日半滄洲縣道行無愧煙蘿有勝遊

彥國通判絳州

結友時未久情親心已照氛埃外自遣風月還同調復  
與任浮沉未嘗趨近要以此雖處貧寧防俗者誚今將  
辭我去盡日來談笑窮巷敞茅茨高言出廊廟且作朱

韞行聊能發光耀當亦就銅墨遠之江海徼山郭寂無  
喧雲川不妨釣所嗟胡越人千里煩登眺

餘姚陳寺丞

試邑來勾越風煙復上游江潮自迎客山月亦隨舟海  
貨通閭市漁歌入縣樓絃琴無外事坐見浦帆收

明州推官鄭先輩

應幕海邊郡秋風千里歸隨潮吳榜駛轉浦楚山微野  
橘霜前熟江螯露下肥還家候靈鵲人想罷鳴機

聚蚊

日落月復昏飛蚊稍離隙聚空雷殷殷舞庭煙幕幕蛛  
網徒爾施塘斧詎能磔猛蝎亦助惡腹毒將肆螫不能  
有兩翅索索緣暗壁貴人居大第蛟綃圍枕席嗟爾於  
其中寧夸觜如戟忍哉傍窮困曾未哀癯瘠利吻競相  
侵飲血自求益蝙蝠空翱翔何嘗為屏獲鳴蟬飽風露  
亦不慙喙息薨薨勿久恃會有東方白

賦秋鴻送劉衡州

沆

秋鴻整羽翮去就自因時往春南方來遂止天泉池天  
泉水清泚鴛鴦日追隨蒲藻豈不樂江湖信所宜今朝  
風色便暫向衡陽歸洞庭逢葉下瀟湘先客飛渚有蘭  
杜美心無稻糧卑罾繳勿爾念鷹隼寧爾窺煙波千萬  
里足以資盤嬉峰前想回日青冥生路歧

清池

泠泠清水池藻荇何參差美人留采掇玉鮪自揚鬢波  
瀾日已淺龜鼈日復滋蝦蟇縱跳梁得以緣其涯競此

長科斗凌亂滿澄漪空有文字質非無簡策施僂鯉勿  
苦羨寧將廬蛤卑徒剖腹中書悠悠誰爾知聊保性命  
理遠潛江海湄泚泚曷足道任彼蛙黽為

弟得臣歸觀并州

知君歸去心已逐秋風起明發登太行遙將望汾水  
藹白雲下吾親正居此拜慶曷為榮新除一官美

張修赴威勝軍判官

青驪渡河水俠氣動刀環入幕沙塵暗臨風鼓角聞地



形通栢谷秋色滿榆關誰復輕儒者難淹筆硯間

弔唐俞

通閨年最少才俊罕能雙鵬去塵栖室魂歸霧起窻慈  
親留漢水愛妾返荆江一稚纔能語皃然寄遠邦

任適尉烏程

俛作程鄉尉折腰還自甘卞峰晴照黛雲水曉澄藍對  
上春田闢蘆中走吏參到時蘋葉長柳惲在江南

馬殿丞通判密州

晨裝辭北闕懷紱貳東侯地本全齊勝風仍變魯優危  
帆淮上去古木海邊秋相送江潭客曾同十載遊

夏侯彥濟武陟主簿

懷縣曾余往風謠為爾知寒先太行近潤接大河卑賓  
酒裁公秫晨羹翦露葵簿書行正委何似布衣時

余居御橋南夜聞祆鳥鳴效昌黎體

都城夜半陰雲黑忽聞轉轂聲咿啾嘗憶楚鄉有祆鳥  
一身九首如贅疣或時月暗過閭里緩音低語若有求

小兒藏頭婦滅火閉門雞犬不爾留我問楚俗何苦爾  
云是鬼車載鬼遊鬼車載鬼奚所及抽人之筋繫車輶  
昔聽此言未能信欲訪上天終無由今來中土百物正  
安得遂與南方儔上帝因風如可達願令驅逐出九州  
月夜與兄公度納涼閒行至御橋

夕月吐澄明陰雲淨如掃空庭引天翠爽氣生懷抱家  
近御橋頭因為橋畔遊倚欄波上影不共水東流思歸  
此清夜何處是江樓四望遠寂歷微風動颼颼觀闕垂

金史四  
卷三  
萬象山河趨九州壯哉帝王宅顧我一蟬螭富貴非可  
取田園今向秋明當拂衣去試與問扁舟

隨州錢相公挽詞

築巖無往夢遊岱有飛魂墮淚隋侯國遺金漢帝恩文  
章流日域忠孝在王門天道何由問秋風徧九原

昔日傷歸國今朝歎舉輶憂愁傳楚些殄瘁感周詩文  
草明時訪忠言故吏知居常嗚咽涕翻作衆人悲

去年伊水上傾府望雲岑路轉猶迴首人誰不殞心可

憐飛語後擠恨九幽深從此埋英骨空令淚滿襟

僧可真東歸因謁范蘇州

仲淹

姑蘇臺畔去雲壑付清機野策過寒水山童護衲衣松  
門正投宿竹笠帶餘暉誰愛杼山句使君應姓韋

廖秀才歸衡山縣

千里倦為客秋歸烏榜輕過林湘橘暗收潦楚江清晚  
泊親鷗鷺殘芳襲杜蘅長沙幾日到天際見高城

魏屯田知楚州

淮南木葉驚淮上使君行天外高帆出沙頭候吏迎夜  
潮通廢埭秋月滿孤城正遲文翁化從來楚俗輕

張子野赴官鄭州

盡室寄東里一官辭上都只應乘小駟寧肯躡雙鳬秋  
雨生陂水高風落廟梧梅山為余訪還有舊家無

擬王維偶然作

嵇康任天性傲散喜端居自云安卑者竊比老莊歟一  
月十五日頭面忘洗梳危坐恣搔虱於時懶作書一曲

情自寄一杯歡有餘尚子志所慕阮生甘不如黃精可  
養壽廣澤宜覩魚不堪行作吏章服裹猿狙

蘇祠部通判洪州

飛鷁去江西秋飈滿桂旗蘆洲花白處楓岸葉丹時沙  
鳥看來沒雲山愛後移高才屬滕閣家擅子卿詩

中秋與希深別後月下寄

薄霧生寒水寥寥艤畫船人傷千里別桂吐十分圓把  
酒非前夕追歡憶去年南樓足佳興好在謝臨川

望芒碭山

出舟眺古岸林外見修岡  
迴頭問榜子前巘是芒碭其  
顛有高廟松栢鬱蒼蒼  
迤邐堆阜屬蕭條茆葉黃  
千古收王氣一川平  
夕陽人家纔四五雞犬自相望  
尚爾想新豐誰復思沛鄉  
臨流一舉酒可以喻悲傷

初見淮山

遊宦久去國扁舟今始還  
朝來汴口望喜見淮上山  
斷嶺碧峰出平沙白鳥閒  
南歸不厭遠況在水雲間



旌義港阻風

清晨下長淮忽值秋風惡渺瀰雲霧昏掀合魚龍作方  
驚白浪高又以寒潮落遠渚時出沒輕舟自前却將投  
古戍迷偶得孤港泊下纜寄蘆林尋村步芒屨儻有白  
醪沽聊為野田酌茆屋何颼颼瓦罌空索索却持杖頭  
歸相顧還寂寞一夕不能眠孤吟當狂藥

依韻和劉六淮潮

汐潮如有信時向舊痕生始覺回波定還看曲渚平舞

鷗隨下上寒日共浮傾後夜人無寐遙聽入浦聲

舟中聞蛩

秋月滿行舟秋蟲響孤岸豈獨居者愁當令客心亂展  
轉重興嗟所嗟時節換時節不苦留川涂行已半霜落  
草根枯清音從此斷誰復過江南哀鴻為我伴

雙野鳬

野水雙紋翼雲蘿謾自媒驚飛帶波起行唳拂萍開暖  
日浮還沒寒汀去復來王喬如可挹僊鳥此徘徊

和才叔岸傍古廟

樹老垂纓亂祠荒向水開  
偶人經雨踣古屋為風摧  
野鳥棲塵坐漁郎奠竹杯  
欲傳山鬼曲無奈楚辭哀

山光寺

煬帝  
故宮

古橋經廢寺蒼蘚舊離宮  
栢殿秋陰冷蓮堂暮色空  
烏啼山靄裏僧語竹林中  
寂寞蕪城近蕭蕭牧笛風

自急流口至長蘆江入金陵

始發碧江口曠然諧遠心  
風清舟在鑑日落水浮金  
瓜

步逢潮信臺城過鴈音故鄉何處是雲外即喬林

早渡長蘆江

帶月出寒浦殘星浸水漬帆開風色正舟急浪花分霧  
氣橫江白雞聲隔岸聞天晴建業近鍾岫起孤雲

采石懷古

青峰來合沓勢壓大江雄舟渡神兵後城荒王氣空山  
根魚浪白巖壁石蘿紅弄月人何在孤墳細草中

望夫山

亭亭千古質曾是念征夫一作山頭石畏看天際途猶  
如託蘿蔓不似采靡蕪時有江雲近僊衣挂六銖

泊牛渚磯

所謂鼓吹山也  
有竹可作笙等

落帆牛渚前便為牛渚宿波搖殘照中采翠浮巖谷巖  
谷足幽篁石上羅寒玉裁作嫺氏笙堪吹鳳凰曲楚客  
夕無眠獨將清籟續更看江月來還想燃犀燭

遊響山

久憶門前勝聊乘逸興遊寒篙進溪曲古木暗城頭鳥

過空潭響船隨碧瀨流梅花三疊罷煙火起滄洲

蕪湖口留別弟信臣

少也遠辭親俱為異鄉客昨日偶同歸今朝復南適  
南適畏簡書叨茲六百石重念我當去送我江之側  
溪山遠更清溪水深轉碧因知惜別情愈賒應愈劇

金霞閣

登臨無盡興清燕日徘徊霞影綠觥落嵐光入牖來  
離宮分碧瓦太液俯青槐好待邀明月瑤琴為一開

送蟾上人遊南嶽

葉下瀟湘闊，盃浮豈道遲。  
賓鴻不到處，危約獨行時。  
翠嶺祝融宅，喬松虞舜祠。  
雲霞遊徧日，振錫更何之。

王公慥東歸

行色上東陌，秋槐葉亂飛。  
囊無一錢用，篋有古書歸。  
羸駟嘶寒草，荒城背落暉。  
莫嫌牛馬隔，走別八行稀。

錢道隅州判官

清曉赴國門，西風生早涼。  
天地大道出，苑樹短亭傍。  
相

看車馬色共照池水光舉酒酒非淺明朝誰重觴話別  
語難盡去後空回腸計彼行路遠幾日至洛陽洛陽多  
舊友一一道相望失意非憔悴懷昔無悲傷無由戀中  
國不久之南方音書儻能問鴻鴈亦將翔此外念出處  
便為參與商到官秋節晚塞近百草黃定隨劉武威校  
獵赤土崗余方楓林下野艇泛滄浪弄月江波闊冒衣  
菱苕香雖知各所適未免涕霑裳搵袂却引顧煙蕪平  
夕陽獨回唯鳥影相與過林塘朋遊頓茲減客心仍未



央

宛陵集卷三

謹案卷一第十四頁後七行野水微波綠刊本水  
訛人據別本改

卷二第十三頁前一行猶認縱裙色按縱字疑訛  
卷三第九頁前四行安得遂與南方儔按宋詩鈔  
得作然

第十一頁後二行出舟眺古岸刊本眺訛跳今改



欽定四庫全書

總校官庶吉士臣張能照  
校對官助教臣吳省蘭  
謄錄貢生臣張賦京

欽定四庫全書薈要

集部

宛陵集卷六

四至

詳校官助教臣常循



欽定四庫全書薈要卷一萬四千四百四十四

集部

宛陵集卷四

宋 梅堯臣 撰

池州進士陳生惠然見過不日且行因以詩贈別  
呼童具雞黍頗識故人期竹館忽枉駕山樽聊解頤  
醉歌返北郭春雨生東陂便與千峯隔登高空復思

春陰

濃淡雲無定淒微氣宇寒鳩鳴桑葉吐村暗杏花殘客

子行裘薄春塘野水寬輕雷欣已發謬作採茶官

春晴對月

雲掃魚鱗靜天開桂魄清梨花鑑中色杜宇畫時聲寥  
落將寒食霸離念故京都無惜春意罇酒為誰傾

植梔子樹二窠十一本於松側

舉世多植梨而我學種梔顏色固不別良苦誠異宜團  
團綠堦側豈畏秋風吹同心誰可贈為詠昔人詩

百舌



天窻明未明  
颯颯過微雨  
已聞高樹頭  
百舌間關語  
幽人枕上聽  
不聽變盡春  
聲始飛去

提壺鳥

山路暗松篠  
幽禽語前後  
上言勸提壺  
下言勸酤酒  
但取醒復醉  
莫問升與斗  
人生朝菌榮  
綠髮可無負

青梅

梅葉未藏禽  
梅子青可摘  
江南小家女  
手弄門前劇  
齒軟莫勝酸  
弃之曾不惜  
寧顧馬上郎  
春風滿行陌

挾彈篇

長安細侯年尚小，獨出春郊不須曉。  
手持柘彈霸陵邊，豈惜金丸射飛鳥。  
金丸射盡飛鳥空，解衣市酒向新豐。  
醉倒銀鉶方肯去，去卧紅樓歌吹中。  
不管花開與花老，明朝還去杜城東。

五日登北山望競渡

南方傳競渡，多在屈平祠。  
簫鼓滿流水，風煙生畫旗。  
千橈速飛鳥，兩舸刻靈螭。  
盡日來江畔，誰知輕薄兒。

寄新安通判錢學士

昔人言訪舟江水賦清泚冬春常一色  
深淺皆見底崖日半寒潭澄明動朱鯉  
君懷素已高塵慮都應洗得歐陽永叔  
回書云見來客問予動靜備詳

昨日使人回聞君與之坐君問我何為  
但云思寡過寡過真未能得便北窻卧  
此趣今已深世間誰與和

建德新墻詩

山解不營堵筠篁為密籬初年固可蔽  
晏歲不能支已

被巢蜂蠹復為荒葛蔓夏雨久枯脆秋風遂傾歌雞鶩  
恣穿逸牛羊來踐窺我議欲板築羣走皆不怡首吏先  
進白土踈不可為潦雨忽暴集澗流如突馳我心賸其  
極斯語其見欺用竹乃戶率破得緣而私冬歛葺西角  
春調完北陞循環日有壞煩擾無虛時介決弗爾惑遂  
飭闢其基榛莽一芟去畚鍤能悅隨膏潤非朽壤峭削  
隱金鉏荏苒未踰月屹如長雲垂䟽濇備水害既圻復  
蓬茨豈唯禦羶豹亦以防狐狸且有內外隔絕聞閭巷

早安然茲燕息來者勿吾隳

九月五日得姑蘇謝學士寄木蘭堂官醞

公田五十畝種秫秋未成杯中無濁酒案上惟丹經忽  
有洞庭客美傳烏與程言盛木蘭露釀作甕間清木蘭  
香未歇玉盞貯華英正值菊初坼便來花下傾一飲為  
君醉誰能解吾醒吾醒已不解百日毛骨輕

九月見梅花

江南風土暖九月見梅花遠客思邊草孤根暗磧沙何

曾逢寄驛空自聽吹笳今日樽前勝其女秋鬢華

新安錢學士以近詩一軸見貺輒成短言用叙單

悵

早事太尉府謬以才見論身作邑中吏日陪丞相尊嵩  
山雲外寺伊水渡頭村泉味入香茗松色開清罇題詩  
人半醉馬上景已昏歸來屬後乘冠蓋迎國門悠悠失  
貧賤冉冉歷涼溫而今處窮僻落莫思舊恩終日自鮮  
適終年長不言已覺人事寡惟聞雞犬喧東風有來信

滿幅蘭與蓀深知故人意遺我滌冥煩一章言罨畫谿  
好如目存何須到雲壑便若遊花源一一先造化可以  
輕瑤琨成誦今在口願將醒病魂

答陳五進士遺山水枕屏

妙畫能成趣谿山迴得君漁舟長映浦巖樹半藏雲征  
雁無時沒橫橋有處分數峰來枕席曾不愧移文

謝賓客挽歌三首

位不登三事才宜列四科清名時自得華冕世空多望

氣悲埋劍臨風歎逝波吳阡蒿作里楚挽薤成歌會葬  
千人至來觀數郡過無由親執紼東首淚滂沱

自昔居門下游觀必許偕豈將千里別遂作九泉乖已  
恨霜松折行嗟玉樹埋蒼生空有望丹旌不勝懷曩日  
言歸里飛章願乞骸今朝赤松畔煙壠對蒼崖

當年罷會稽還郡錦為衣老作龍樓貴終將鳳沼違英  
魂遊岱去石擲渡江歸揚子春風惡南徐過客稀衆帆  
看屢溺素舸獨如飛始見中郎孝松門自有輝



往東流江口寄內

艇子逐溪流來至碧江頭隨山知幾曲一曲一增愁巢  
蘆有翠鳥雄雌自相求擘波投遠空丹喙橫輕脰呼鳴  
乃不已共啄向蒼洲而我無羽翼安得與子遊

代內答

結髮事君子衣袂未嘗分今朝別君思歷亂如絲棼征  
僕尚顧侶嘶馬猶索羣相送不出壺倚楹羨飛雲日暮  
秋風急雀聲簷上集併作千里愁愁極翻成泣

訪磽坑老僧

山深無外事，日夕愛潺湲。  
趺坐樹間石，力耕溪上田。  
解言南國事，能詠碧雲篇。  
莫貴遠公酒，余非陶令賢。

除夕與家人飲

莫嫌寒漏盡，春色來應早。  
風開玉砌梅，薰歇金爐草。  
稚齒喜成人，白頭嗟更老。  
年華箇裏催，清鏡寧長好。

立春在元日

新春與新歲，時候不相先。  
未肯欺殘臘，何曾占舊年。  
綴

條花翦綵挿戶柳生煙獨坐空山裏唯驚節物遷

遊水簾巖

春山時獨往榛穢旋芟斲飛泉蔽幽巖杳藹䟽朝旭光  
垂白龍髯鳴漱寒潭玉半壁生畫寒陰草潤秋綠穿藤  
出溪口流沫縈山足莫遣吏人來方歌白雲曲

詠官妓從人

少為輕薄悞失行落優倡去作小家婦願同貧里裝無  
心歌子夜有意學流黃他日東郊上誰人見採桑

夏雨

林梅初弄熟密雨閉重關潤衰衣巾上涼生竹樹間水  
聲通遠澗雲色暝前山野鳥寂無語公庭盡晝閒

五日與陳真卿飲

五日逢南國三年別舊都招魂傳楚客撫節見靈巫蒿  
艾因時採蛟龍為俗驅清罇與鷺炙忻此故人俱

彼鷺吟

斲木喙雖長不啄栢與松松栢本堅直中心無蠹蟲廣

庭木云美不與松栢比臃腫質性虛朽蝎招猛豮主人  
赫然怒我愛爾何毀彈射出窮山羣鳥亦相喜啁啾弄  
好音自謂得天理哀哉彼鴛鴦吻血徒為爾鷹鷂不搏  
擊狐兔縱橫起況茲樹腹怠力去宜濱死

感遇

衆默瘖莫辨衆寐盲不知問而使之對覺而使之窺瘖  
盲自窮矣所感在一時苟昧哲人理寐默定妍媸

雪詠

雪色混青冥  
寒幃宿酒醒  
龍蛇緣古木  
鳳鵠舞幽庭  
密勢因風力  
輕姿任物形  
公堂何寂寞  
橫案對玄經

臘日出獵因遊梅山蘭若

我與二三騎  
爭馳孤戍旁  
逐麋逢野寺  
息馬據胡牀  
鷹想支公好人  
思灞上狂  
歸來何薄暮  
煙火照溪光

依韻和楊敏叔吳門秋晚見寄

方在洞庭上  
秋懷那得禁  
西風楚波急  
度雁海雲陰  
洛客吟初苦  
騷人思已深  
顛毛隨日減  
冉冉不勝簪

田家

南山嘗種荳碎莢落風雨空收一束其無物充煎釜

陶者

陶盡門前土屋上無片瓦十指不濡泥鱗鱗居大廈

縣署叢竹

裊裊幽亭竹團團自結叢寒生綠罇上影入翠屏中陶  
柳應慙弱潘花只競紅方持雪霜操不敢倚春風

巧婦

巧婦口流血辛勤非一朝  
芳茶時補絳風雨畏漂搖  
所託樹枝弱而嗟巢室翹  
周公誠自感聊復賦鴟鴞

聞歐陽永叔謫夷陵

共在西都日居常慷慨言  
今嬰明主怒直雪諫臣冤  
謫向蠻荆去行當霧雨繁  
黃牛三峽近切莫聽愁猿

聞尹師魯謫富水

朝見諫臣逐暮章從謫官  
附炎人所易抱義爾惟難  
寧作沉泥玉無為媚渚蘭  
心知歸有日時向斗牛看



寄饒州范待制

山水番君國文章漢侍臣古來中酒地今見獨醒人坐  
嘯安浮俗談詩接上賓何由趨盛府徒爾望清塵

詠王右丞所畫阮步兵醉圖

胡公疎  
新勒石

右軍筆通妙阮籍思玄虛獨畫來東平倒冠醉乘驢力  
頑不肯進俛首耳前趨一人牽且顧一士旁挾扶捉鞍  
舉雙足閉目忘窮途想像得風度纖悉古衣裾玉骨化  
為土丹青終不渝而今幾百歲乃有胡公疎買石遂畱

刻漬墨許傳模白黑就彷彿毫芒辨精麤千古畜深意  
終朝懸座隅誰謂盈尺紙不慙雲霧圖

猛虎行

山木暮蒼蒼風淒淒葉黃有虎始離穴熊羆安敢當掉  
尾為旗轟磨牙為劍鉉猛氣吞赤豹雄威躡封狼不貪  
犬與豕不窺藩與墻當途食人肉所獲乃堂堂食人既  
我分安得為不祥麋鹿豈非命其類寧不傷滿野設置  
網競以充圓方而欲我無殺柰何饑餒腸

白鵬

喬木暗青山晴川下白鵬春雲生嶺上積雪在囂間綠  
草張新翳柔冠總翠鬟時哉養文素不是雜斑斑

後園桃李花

後園桃李花灼灼復皎皎南枝開已繁北枝榮尚少  
萼相輝映根本自鈎繞無為驚風吹紛紛逐飛鳥

道傍虎跡行

朝履猛虎跡暮宿猛虎林猛虎終夜嘯陰風生遠岑我

懷何所畏所畏在官箴傷哉此遺體冒險輕百金

脩真觀李道士年老貧餓無所依忽縊死因為詩  
以悼之

唐室王子後黃冠事隱淪餐霞不滿腹披雲不蔽身八  
十不能死縊以頭上巾始慕老莊術終厭道德貧營營  
求長生反困甌中塵

野田行

輕雷長陂水農事乃及辰茅旌送山鬼瓦鼓迎田神青

臯暗藏雉萬木欣已春桑間耦耕者誰復來問津

水輪詠

孤輪運寒水無乃農者營隨流轉自速居高還復傾利  
纔畎澮間功欲霖雨并不學假混沌亡機抱甕罌

山村行

征馬去不息幽禽隨處聞深源樹翁鬱曲塢花分盞淡  
淡平田水濛濛半嶺雲長鬟弄春女溪上自湔裙

鳴雉詞

雄雉鳴桑林雌雉雊麥隴結愛誠有宜別啄義亦竦哺  
雛深莽中摧頽錦翅擁辛勤何爾為應自念遺種

寄公異弟

池塘去後春一夕生綠草無由夢阿連詩句何能好

去春城

前日去春城今朝還故陌馬有甚煩意人多遠行色暫  
爾厭風埃那堪為久客

讀范桐廬述嚴先生祠堂碑

二蛇志不同相得榛莽裏一蛇化為龍一蛇化為雉龍  
飛上高衢雉飛入深水為蜃自得意潛游滄海溟變化  
雖各殊有道固終始先武與嚴陵其義亦云爾所遇在  
草昧既貴不為起翻然歸富春曾不相助治至今存清  
芬烜赫耀圖史人傳七里灘昔日來釣此灘上水濺濺  
灘下石齒齒其人不可見其事清且美有客乘朱輪徘  
徊想前執著辭刻之碑復使存厥祀欲以廉貪夫又以  
立懦士千載名不忘休哉古君子

金... 卷四

禽言四首

子規

不如歸去春山云暮萬木兮參雲蜀天兮何處人言有翼可歸飛安用空啼向高樹

提壺

提壺蘆沽美酒風為賓樹為友山花繚亂目前開勸爾今朝千萬壽

山鳥



婆餅焦兒不食爾父向何之爾母山頭化為石山頭化  
石可柰何遂作微禽啼不息

竹雞

泥滑滑苦竹崗雨蕭蕭馬上郎馬蹄凌兢雨又急此鳥  
為君應斷腸

讀漢書梅子真傳

子真實吾祖耿介仕炎漢權臣始擅朝忠良被塗炭輦  
下莫敢言上書陳治亂是時卿大夫曾不負愧汗其文

信雄深爛然今可玩危言識禍機滅迹思汗漫一朝弃  
妻子龍性寧羈絆九江傳神僊會稽隱廬閑舊市越溪  
陰家山鏡湖畔唯餘千載名撫卷一長歎

宛陵集卷四